



4. januar 2010

Inatsisartut suleriaasianni § 36 imm. 1 naapertorlugu Naalakkersuisunut apeqqut imaattoq matumuuna saqqummiuppara:

- 1. Nunatsinniit akiliunneqarlutik Nunarput qimallugu ilinniagaqarsimallutik naammassinnittartut qassit procentii Nunatsinnut uteqqittannginersut ilisimaneqarnerluni?**
- 2. Ilinniagaqarsimallutik Nunatsinnut uteqqinneq ajortut qanormita annertutigisumik Nunatta aningaasartuutigisarpai?**
- 3. Ilinniakkaminnik naammassinnereerlutik Nunatsinnut uteqqinneq ajortut taakkununga aningaasartuutaasimasunik taarsiitinneqartalernissaannik Naalakkersuisut pilersaaruteqarnerlutik?**

(Inatsisarunut ilaasortaq Malik Berthelsen, Siumut)

Tungavilersuutit:

Air Greenland-ip pisortaanerata, Michael Binzer-ip, tusagassiuutitigut oqallissaarutaa / siunnersuutaa tungavigalugu qulaani apeqqutit pingasut uteqqinngikkaluarlugit Naalakkersuisunut paasisaqarfigerusullugit apeqqutigaakka.

Inuusuttut qaffasinnerusumik ilinniagaqarniarlutik Nunarput qimattariaqarlugu ilinniagaqariartortartut soorunami nersualaarneqartariarput. Taakuuppummi Nunatsinni atorfinnik qaffasinnerusunik amigaatigisatsinnik atorfissaqartinneqarlutillu tigusisussaasut.

Taamaakkaluartoq tusartarlutigulu nalunngilarput ilinniartut tamakkerlutik Nunatsinnut uteqqinneq ajortut. Tamatumunnga pissutaasut assigiinngitsuusartut nalunngilarput. Soorlu qallunaanik ilaqaqalersimaneq, nunani allani inuunermik misilittakkanillu misigisaqaaqqaarumaneq aammalu inuuniarnikkut periarfissatigullu Nunatsinniit pitsaanerusunik atugassaqaqtitaanerit pissutigalugit.



SIUMUT INATSISARTUNI ILAASORTAAQ / LANDSTINGSMEDLEM

Soorunami ilinniartup nammineerluni kiffaanngissuseralugulu aaliangigassaraa Nunatsinni nunattaluunniit avataani najugaqassanerluni aamma peqqinnartuuvoq inuusuttuunermi allanik misigisassarsiornissaq misilittaanissarlu.

Taamaakkaluartoq Michael Binzer isumaqatigaara oqarmat, Nunatsinniit akiliunneqarlutik ilinniagaqarsimasut pinngitsooratik Nunatsinni qujaniallutik sulisariaqartassasut. Soorlumi timmisartunik mitsitsisartunngorniat naammassigaangamik Nunatsinni piffissami aalajangersimasumi pinngitsooratik sulisarnissaat piumasaqaataasoq.

Ilinniartut piumasaqarfigilernerisigut inuusuttut ilinniarusussusaasa appariarnissaa ernumatissaanngitsutut isumaqarfigaara. Akerlianik piumasaqarneruneq Nunatsinnut ilinniartitaanikkut aningaasaqarnikkullu imminut akilersinnaanerusutut isigaara.

Ilinniartup aalajangiussimappagu ilinniakkani Nunatsinni atorniarnagu Nunatsinnulluunniit uteqqinniarani taava akisussaaffik nammineerluni nammattariaqaraa isumaqarpunga.